





1932



才調集
二






才調集卷第四

古律雜歌詩一百首

杜牧三十三首

題桐葉

去年桐落故溪上把葉因題歸燕詩江樓今日
送歸燕正是去年題葉時葉落燕歸真可惜東
流玄髮且無期笑筵歌席反惆悵朗月清風見
別離莊叟彭殤同在夢陶潛身世兩相遺一丸
五色成虛語石爛松薪更不疑奢侈不勞文似
錦進趨何必利如錐錢神任爾知無敵酒聖於



吾亦庶幾江畔秋光蟾閣鏡檻前山色茂陵眉
罇香輕泛數枝菊簷影斜侵半局碁休指宦遊
論巧拙只將愚直禱神祇三吳煙水平生念寧
向閑人道所之

題齊安城樓

鳴軋江樓角一聲微陽潏潏落寒汀不用憑欄
苦迴首故鄉七十五長亭

揚州二首

煬帝雷塘土迷藏有舊樓誰家唱水調明月滿
揚州煬帝開汴渠成自作水調駿馬宜閑出千金好暗遊喧

闌醉年少半脫紫茸裘

秋風放螢苑春草鬪雞臺金絡擎鵬去鸞鬢拾
翠來蜀船紅錦重越橐水沉堆處處皆華表淮
王奈却迴

九日登高

江涵秋影鴈初飛與客攜壺上翠微塵世難逢
開口笑菊花須插滿頭歸但將酩酊酬佳節不
用登臨歎落暉古往今來只如此牛山何必獨
沾衣

早鴈

金河秋半虜絃開雲外驚飛四散哀仙掌月明
孤影過長門燈暗數聲來須知胡馬紛紛在豈
逐春風一一迴莫厭瀟湘少人處水多菰米岸
莓苔

舊遊

閑吟芍藥詩悵望久頻眉盼眇迴眸遠纖衫整
鬢遲重尋春書夢笑把淺花枝小市長陵住非
郎爭得知倅疑

村舍燕

漢宮一百四十五多下珠簾閉瑣窻何處營巢

夏將半菰簷煙裏語雙雙

題宣州開元寺水閣

閣下宛陵夾溪居人

六朝文物草連空天澹雲閑今古同鳥去鳥來
山色裏人歌人哭水聲中深秋簾幕千家雨落
日樓臺一笛風惆悵無因見范蠡參差煙樹五
湖東

爲人題二首

我之凌雲稱君無買笑金虛傳南國兒爭奈五
陵心桂席塵瑤珮瓊爐燼水沉凝魂輕薦夢低
珥悔聽琴日落珠簾卷春寒錦幕深誰家樓上

笛何處月明砧蘭逕飛胡蝶筠籠語翠禽和簪
拋鳳髻將淚入鴛衾的的添新恨迢迢絕好音
文園終病渴休詠白頭吟

綠樹鶯鶯語平江燕燕飛枕前聞鴈去樓上送
春歸半月縮雙臉凝腰素一圍西墻苔漠漠南
浦夢依依有恨簪花懶無慘鬪草稀雕籠長慘
澹蘭畹謾芳菲鏡斂青蛾黛燈拋皓腕肌避人
勻迸淚拖袖倚殘暉有兒雖桃李單栖足是非
雲軒載取去寒夜看裁衣

池州春日送人

芳草復芳草斷腸還斷腸自然堪下淚何必更
殘陽楚岸千萬里燕鴻三兩行有家歸未得况
舉別君觴

長安送人

子性極弘和愚衷深褊猶相捨置饒中吾過何
由鮮楚南饒風煙湘岸苦紫宛山密夕陽多人
稀芳草遠青梅繁枝低班筍新梢短莫哭葬魚
人酒醒且眠飯

驪山感舊二首

新豐綠樹起黃埃數騎漁陽探使迴霓裳一曲

千峯上舞破中原始下來
長安迴望繡成堆山頂千門次第開一騎紅塵
妃子笑無人知道荔枝來

街西

碧池新漲浴嬌鴉深鎖長安富貴家遊騎偶逢
人鬪酒名園相倚杏交花銀鞍驟裏嘶宛馬繡
鞅瓏走鈿車一曲將軍何處笛連雲芳樹日
將斜

江南春

千里鶯啼綠映紅水村山郭酒旗風南朝四百

八十寺多少樓臺煙雨中

寄人

青山隱隱水迢迢秋盡江南草木彫二十四橋
明月夜玉人何處教吹簫

寄遠三首

前山極遠碧雲合清夜一聲白雪微欲寄相思
千里月傍溪殘照兩霏霏
南陵水面謾悠悠風緊雲輕欲變秋正是客心
孤迥處誰家紅袖倚江樓
隻影隨驚鴈單棲鎖畫籠向春羅袖薄誰念舞

臺風

赤壁

折戟沉沙鐵未銷，自將磨洗認前朝。
東風不與周郎便，銅雀春深鎖二橋。

月

三十六宮秋夜深，昭陽歌斷信沉沉。
唯應獨伴陳皇后，照見長門望幸心。

定子

濃檀一抹廣陵春，定子初開睡臉新。
却笑喫虛隋煬帝，破家亡國爲何人。

題揚州

落托江南載酒行，楚腰纖細掌中輕。
十年一覺揚州夢，贏得青樓薄倖名。

題水口草市

倚溪侵嶺多高樹，誇酒書旗有小樓。
驚起鴛鴦豈無恨，一雙飛去却迴頭。

漢江

溶溶漾漾白鷗飛，綠淨春深好染衣。
南去北來人自老，夕陽長送釣船歸。

柳

唐周集四

六

日落水流西復東春光不盡柳何窮巫娥廟裏
低含兩宋玉宅前斜帶風不將榆莢共爭翠深
感杏花相映紅灞上漢南千萬樹幾人遊宦別
離中

悼吹簫妓

玉簫聲斷歿流年滿眼春愁墮上煙艷質已隨
雲雨散鳳樓空鎖月明天

題贈二首

娉娉裊裊十三餘葢蔻梢頭二月初春風十里
揚州郭卷上珠簾揔不如

多情却似揔無情但覺罇前笑不成蠟燭有心
還惜別替人垂淚到天明

秦淮

煙籠寒水月籠沙夜泊秦淮近酒家商女不知
亡國恨隔江猶唱後庭花

代人寄遠二首

七言一本作一首

河橋酒旆風軟候館梅花雪嬌宛陵樓上春晚
我郎何處情鏡

繡領任垂蓬髻丁香閑結春梢賸肯新年歸否
江南綠草迢迢

張泌一十八首

惜花

蝶散鶯啼尚數枝日斜風定更離披
看多記得傷心事金谷樓前妾地時

寄人

別夢依依到謝家小廊迴合曲欄斜
多情只有春庭月猶爲離人照落花

又

酷憐風月爲多情還到春時別恨生
倚柱尋思倍惆悵一場春夢不分明

邊上

戍樓吹角起征鴻獵獵寒旌背晚風
千里暮煙愁不盡一川秋草恨無窮
山河慘澹關城閉人物蕭條市井空
只此旅魂招未得更堪迴首夕陽中

長安道中早行作

客離孤館一燈殘牢落星河欲曙天
雞唱未沉函谷月鴈聲新度灞陵煙
浮生已悟莊周蝶壯志仍輸祖逖鞭
何事悠悠策羸馬此中辛苦過流年

洞庭阻風

空江浩蕩景蕭然盡日孤蒲泊釣船青草浪高三月渡綠楊花撲一溪煙情多莫舉傷春日愁極兼無買酒錢猶有漁人數家住不成村落夕陽邊

春日旅泊桂州

暖風芳草竟芊綿多病多愁負少年弱柳未勝寒食雨好花爭奈夕陽天溪邊物色宜圖畫林伴鶯聲似管絃獨有離人開淚眼強憑盃酒亦潸然

晚次湘源縣

煙郭遙聞向晚雞水平舟靜浪聲齊高林帶雨楊梅熟曲岸籠雲謝豹啼二女廟荒汀樹老九疑山碧楚天低湘南自古多離怨莫動哀吟易慘悽

惆悵吟

秋風丹葉動荒城慘澹雲遮日半明晝夢却因惆悵得晚愁多為別離生江淹彩筆空留恨莊叟玄談未及情千古怨魂銷不得一江寒浪若為平

秋晚過洞庭

征帆初挂酒初酣暮景離情兩不堪千里晚霞
雲夢北一洲霜橘洞庭南溪風送雨過秋寺澗
石驚龍落夜潭莫把羈魂吊湘鬼九愁凝絕鎖
煙嵐

題華嚴寺木塔

六街晴色動秋光雨霽憑高只易傷一曲晚煙
浮渭水半橋斜日照咸陽休將世路悲塵事莫
指雲山認故鄉回首漢宮樓閣暮數聲鐘鼓自
微茫

經舊遊

暫到高唐曉又還丁香結夢水潺潺不知雲雨
歸何處歷歷空留十二山

碧戶

碧戶扃魚鑠蘭窗掩鏡臺落花疑悵望歸燕自
徘徊詠絮知難敵傷春不易裁恨從芳草起愁
為晚風來衣惹湘雲薄眉分楚岫開香濃眠舊
枕夢好醉春盃小障明金鳳幽屏點翠苔寶箏
橫塞鴈怨笛落江梅卓氏仍多酒相如正富才
莫教琴上意翻作鶴聲哀

芍藥

香清粉澹怨殘春，蝶翅蜂鬚戀紫塵。閑倚晚風
生，悵望靜留遲日，學因循。休將薜荔為青瑣，好
與玫瑰作近隣。零落若教隨暮雨，又應愁殺別
離人。

春晚謠

雨微微，煙霏霏。小庭半拆紅薔薇。鈿箏斜倚畫
屏曲，零落幾行金鴈飛。蕭關夢斷無尋處，萬疊
春波起南浦。凌亂楊花撲繡簾，晚窻時有流鶯
語。

所思

空塘水碧，春雨微。東風散漫，楊花飛。依依南浦
夢猶在，脉脉高唐雲不歸。江頭日暮多芳草，極
目傷心煙悄悄。隔江紅杏一枝明，似玉佳人俯
清沼。休向春臺更迴望，銷魂自古因惆悵。銀河
碧海共無情，兩處悠悠起風浪。

春夕言懷

風透疎簾，月滿庭。倚欄無事，倍傷情。煙垂柳帶
纖腰軟，露滴花房怨。臉明愁逐野雲銷，不盡情
隨春浪去。難平幽窻，謾結相思夢，欲化西園蝶。

未成

春江雨

雨溟溟風零零老松瘦竹臨煙汀空江冷落野
雲重雲中孤燭微如星夜驚溪上漁人起滴瀝
蓬聲滿愁耳子規叫斷獨未眠罨岸春濤打船
尾

戴叔倫四首

秋日行

山曉旅人去天高秋氣悲明河川上沒芳草露
中衰一作此別又千里少年能幾時心知剡溪

路聊且寄前期

漸次空靈戊

寒盡鴻先至春回客未歸早知名是病不敢繡
爲衣霧積川原暗山多郡縣稀明朝下湘岸更
逐鷓鴣飛

贈韓道士

日暮秋風吹野花上清歸客意無涯桃源寂寂
煙雲閉天路悠悠星漢斜還似世人生白髮定
知仙骨變黃芽東城南陌頻相見應是壺中別
有家

潭州使院書情寄江夏賀蘭副端

雲雨一蕭散悠悠關復河俱從泛舟役近隔洞
庭波楚水去不盡秋風今又過無因得相見却
恨寄書多

宋邕一首

春日

輕花細葉滿林端昨夜春風曉色寒黃鳥不堪
愁裏聽綠楊宜向雨中看

曹唐二十四首

病馬五首呈鄭校書章三吳十五先輩

駉駉何年別渥洼病來顏色半泥沙四蹄不鑿
金砧裂雙眼慵開玉燭斜墮月兔毛乾殼棘失
雲龍骨瘦查牙平原好放無人放嘶向秋風首
宿花

攏上沙葱葉正齊騰黃猶自跼羸蹄尾蟠夜雨
紅絲脆頭掉秋風白練低力憊未思金絡腦影
寒空望錦障泥階前莫怪垂雙淚不遇孫陽不
敢嘶

不剪焦毛鬣半翻何人別是古龍孫風吹病骨
無驕氣土蝕驄花見卧痕未噴斷雲歸漢苑曾

追輕練適吳門一朝千里心猶在爭肯潛忘鍊
飼恩

空被秋風吹病毛無因濯浪刷洪濤卧來揔怪
龍蹄踞瘦盡誰驚虎口高追電有心猶款段逢
人相骨強嘶號欲將鬚鬣重裁前刀乞借新成利
鉸刀
病久無人着意看玉華衫色欲凋殘飲驚白露
泉花冷喫怕清秋豆葉寒長檐敢辭紅錦重舊
韁寧畏紫絲蟠王良若要相擡舉千里追風也
不難

大遊仙劉晨阮肇遊天台

樹入天台石路新雲和草靜迥無塵煙霞不省
生前事水木空疑夢後身往往雞鳴巖下月時
時犬吠洞中春不知此地歸何處須就桃源問
主人

劉阮洞中遇仙人

天和樹色靄蒼蒼霞重嵐深路渺茫雲實滿山
無鳥雀水聲沿澗有笙篁碧沙洞裏乾坤別紅
樹枝邊日月長願得花間有人出免令仙犬吠

劉郎

仙子送劉阮出洞

殷勤相送出天台，仙境那能却再來。
雲液既歸須強飲，玉書無事莫頻開。
花當洞口應長在水，人到人間定不迴。
惆悵溪頭從此別，碧山明月照蒼苔。

仙子洞中有懷劉阮

不將清瑟理霓裳，塵夢那知鶴夢長。
洞裏有天春寂寂，人間無路月茫茫。
玉沙瑤草連溪碧，流水桃花滿澗香。
曉露風燈易零落，此生無處訪劉郎。

劉阮再到天台不復見諸仙子

再到天台訪玉真，青苔白石已成塵。
笙歌寂寞唯深洞，雲鶴蕭條絕舊隣。
草樹摠非前度色，煙霞不似往年春。
桃花流水依然在，不見當時勸酒人。

張碩重寄杜蘭香

碧落香銷蘭路秋，星河無夢夜悠悠。
靈妃不降三清駕，仙鶴空成萬古愁。
皓月隔花追欸別，瑞煙籠樹省淹留。
人間何事堪遺恨，海色西風十二樓。

玉女杜蘭香不嫁於張碩

天上人間兩渺茫不知誰識杜蘭香
來經玉樹三山遠去隔銀河一水長
怨入清塵愁錦思酒傾玄露醉瑤觴
遺情更說何珍重擘破雲鬢金鳳凰

蕭史攜弄玉上昇

豈是丹臺歸路遙紫鸞煙駕不同飄
一聲洛水傳幽咽萬片宮花共寂寥
紅粉美人愁未散清華公子笑相邀
縹山碧樹青樓月腸斷春風爲玉簫

黃初平將入金華山

莫道真遊煙景餘瀟湘有路入金華
溪頭鶴樹春長在洞口人間日自斜
一水暗鳴閑遶澗五雲長往不還家
白羊成隊難收拾喫盡溪邊巨勝花

織女懷牽牛

北斗佳人雙淚流眼穿腸斷爲牽牛
封題錦字凝新思拋擲金梭織舊愁
桂樹三春煙漠漠銀河一水夜悠悠
欲將心向仙郎說借問榆花早晚秋

漢武帝思李夫人

惆悵冰顏不復歸，晚秋黃葉滿天飛。
迎風細荇傳香粉，隔水殘霞見畫衣。
白玉帳寒鴛夢絕，紫陽宮遠鴈書稀。
夜深池上蘭橈歇，斷續歌聲徹太微。

小遊仙三首

偷來洞口訪劉君，緩步輕擡玉線裙。
細擘桃花擲流水，更無言語倚彤雲。
風動閑天青桂陰，水精簾箔冷沉沉。
西妃少女多春思，斜倚彤雲盡日吟。

方士飛軒住碧霞，酒寒風冷月初斜。
不知誰唱歸春曲，落盡溪頭白葛花。

長安春舍敘邵陵舊宴懷永門蕭使君

五首

邵陵佳樹碧葱龍，河漢西沉宴未終。
殘漏五更傳海月，清笳三會揭天風。
香熏舞席雲鬢綠，光射頭盤蠟燭紅。
今日却懷行樂處，兩床絲竹水樓中。

不知何路却飛翻，虛受賢侯鄭重恩。
五夜清歌敲玉樹，三年洪飲倒金罇。
招攜永感雙魚在，報

峇空知一劍存狼籍梨花滿城月當時長醉信
陵門

粉疊彤軒畫障西水雲紅樹窄璇題鷓鴣欲絕
歌聲定鸚鵡初驚舞袖齊坐對玉山空甸線細
聽金石怕低迷東風夜月三年飲不省非時不
似泥

木魚金鑰鎖重城夜上紅樓縱酒情竹葉水繁
更漏促桐花風軟管絃清百分散打銀船溢十
指寬催玉筯輕星斗盡稀賓客醉碧雲猶戀艷
歌聲

三年身逐漢諸侯賓榻容居最上頭飽聽笙歌
陪痛飲熟尋雲水縱閑遊朱門鎖閉煙嵐暮鈴
閣清泠水木秋月滿前山圓不動更邀詩客上
高樓

施肩吾二首

夜讌曲

蘭缸如晝買不眠玉爐夜起沉香煙青娥一行
十二仙欲笑不笑桃花燃碧窻弄粧梳洗晚戶
外不知銀漢轉被郎嗔罰屠蘇盞酒入四肢紅
玉軟

代征婦怨

寒窗羞見影相隨
嫁得五陵輕薄兒
長短艷歌君自解
淺深更漏妾偏知
畫裙多淚鴛鴦濕
雲鬢慵梳玳瑁垂
何事不看霜雪裏
堅貞惟有古松枝

趙光遠三首

題北里妓人壁

魚鑰獸環斜掩門
萋萋芳草憶王孫
醉徒青瑣窺韓壽
閑擲金梭惱謝琨
不夜珠光連玉匣
辟寒釵影落瑤樽
欲知腸斷相思處
役盡江淹別

後魂

詠手二首

粧成皓腕洗凝脂
背接紅巾水時薄
霧袖中拈玉笋
斜陽屏上撚青絲
喚人急拍臨前檻
摘杏高揜近曲池
好是琵琶絃畔見
細圓無節玉參差

撚玉磋瓊軟復圓
綠窻誰見上琴絃
慢籠彩筆閑書字
斜指瑤階笑打錢
指面試香添麝炷
舌頭輕點貼金鈿
象床珍簟宮碁處
拈定文楸占角邊

孫啓四首

贈妓人

綵翠仙衣紅玉膚，輕盈年在破瓜初。
霞盃醉喚劉郎賭，雲髻慵邀阿母梳。
不怕寒侵緣帶寶，每憂風舉倩持裾。
謾圖西子為粧樣，西子元來未得如。

題北里妓人壁三首

移壁迴窻費幾朝，指環偷解博紅椒。
無端鬪草輸隣女，便被拈將玉步搖。
寒繡衣裳餉阿嬌，新團香獸不禁燒。
東隣起樣

裙腰闊剩蹙黃金，一兩條

試共卿卿語笑麤，畫堂連遣侍兒呼。
寒肌不耐金如意，白獺為膏郎有無。

崔珏七首

和友人鴛鴦之什三首

翠鬢紅毛舞夕暉，水禽情似此禽稀。
暫分煙島猶回首，只渡寒塘亦共飛。
映霧盡迷珠殿瓦，逐梭齊上玉人機。
採蓮無恨蘭橈女，笑指中流羨爾歸。

寂寂春塘煙晚時，兩心如影共依依。
溪頭日暖

眠沙穩渡口風寒浴浪稀翡翠莫誇饒彩飾鷓
鴉須羨好毛衣蘭深芷密無人見相逐相呼何
處歸

舞鶴翔鸞俱別離可憐生死兩相隨紅絲毳落
眠汀處白雪花成蹙浪時琴上只聞交頸語窻
前空展共飛詩何如相見長相對肯羨人間多
所思

有贈二首

莫道粧成斷客腸粉背綿手白蓮香煙分頂上
三層綠劒截眸中一寸光舞勝柳枝腰更軟歌

嫌珠貫曲猶長雖然不似王孫女解愛臨卣賣
賦郎

錦里芬芳少佩蘭風流全占似君難心迷曉夢
窻猶暗粉落香肌汗未乾兩臉天桃從鏡發一
眸春水照人寒自嗟此地
吾土不得如花歲
歲看

和人聽歌二首

氣吐幽蘭出洞房樂人先問調宮商聲和細管
珠才轉曲度沉煙雪更香公子不隨腸萬結離
人須落淚千行巫山唱罷行雲過猶自微塵舞

畫梁

紅臉初分翠黛愁錦筵歌板拍清秋一樓春雪
和塵落午夜寒泉帶雨流座上美人心盡死罇
前旅客淚難收莫辭更送劉郎酒百斛明珠異
日酬

司空曙三首

病中遣妓

萬事傷心在目前一身垂淚對花筵黃金用盡
教歌舞留與它人樂少年

江村即事

罷釣歸來不繫船江村月落正堪眠縱然一夜
風吹去只在蘆花淺水邊

峽口送友人


峽口花飛欲盡春天涯去住淚霑巾來時萬里
同爲客今日翻成送故人

項斯一首

咸陽送處士

古道白迢迢咸陽離別橋越人無水處秦樹帶
霜朝騎馬言難盡分程望易遙秋來未相見此
意各蕭條

才調集卷第四



才調集卷第五

古律歌詩一百首

元稹五十七首

夢遊春七十韻

昔歲夢遊春夢遊何所遇夢入深洞中遂果平生趣清泠淺漫流畫舫蘭篙渡過盡萬株桃盤旋竹林路長廊抱小樓門牖相迴牙樓下雜花叢叢邊繞鷓鴣池光漾霞影曉日初鳴煦未敢上階行頻移曲池步烏龍不作聲碧玉曾相慕漸到簾幕間徘徊意猶懼閑窺東西閣竒玩叅

差布隔子碧油糊
駝鈎紫金鍍
逡巡日漸高
影響人將寤
鸚鵡飢亂鳴
嬌娃睡猶怒
簾開侍兒起
見我遙相諭
鋪設繡紅茵
施張鈿裝具
潛塞翡翠帳
瞥見珊瑚樹
不辨花兒人
空驚香若露
身迴夜合偏
態斂晨霞聚
睡臉桃破風
汗粧蓮委露
叢梳百葉髻
時勢金蹙重臺屨
踏殿紕軟鈿頭裙
色琴瑟玲瓏合歡袴
夾縵鮮妍脂粉薄
暗澹衣裳故
最似紅牡丹
雨來春欲暮
夢魂良易驚
靈境難以寓
夜夜望天河
無由重沿沂
結念心所期
返如禪頓悟
覺來八九年
不向花迴顧

雜合兩京春
喧闐衆禽護
我到看花時
但作懷仙句
浮生轉經歷
道性尤堅固
近作夢仙詩
亦知勞肺腑
一夢何足云
良時事婚娶
當年二紀初
嘉節三星度
朝舜玉佩迎
高松女蘿附
韋門正全盛
出入多歡裕
甲第漲清池
鳴騶引朱輅
廣榭舞菱鞋
長筵賓雜厝
青春詎幾日
華實潛幽蠹
秋月照潘郎
空山懷謝傅
紅樓嗟壞壁
金谷迷荒戍
石壓破欄干
門摧舊榷柝
雖云覺夢殊
同是終難駐
棕緒竟何如
焚絲不成約
卓女白頭吟
阿嬌金屋賦
重壁盛姬臺
青塚明妃墓

盡委窮塵骨皆隨流波注幸有古如今何勞縑
比素況余當盛時早歲諧如務詔冊冠賢良諫
垣陳好惡三十再登朝一登還一仆寵榮非不
早遭迴亦云屢直氣在膏肓氛氲日沉痼不言
意不快快意言多忤忤誠人所賊性亦天之付
乍可沉爲香不能浮作瓠誠爲堅所守未爲明
所措事事身已經營營計何誤美玉琢文珪良
金填武庫徒謂自堅自安知受龍鑄長絲羈野
馬密網羅陰兔物外各迢迢誰能遠相錮時來
旣若飛禍速當如鶩曩意自未精此行何所訴

努力去江陵笑言誰與晤江花縱可憐奈非心
所慕石竹逞姦黠蔓菁誇畝數一種薄地生淺
深何足妬荷葉水上生團團水中住瀉水置葉
中君看不相汚

桐花落

莎草遍桐陰桐花滿莎落蓋覆相團圓可憐無
厚薄昔歲幽院中深堂下簾幕同在後門前因
論花好惡君誇沉檀樣云是指搗作暗澹滅紫
花拘連蹙金萼都繡六七枝鬪成雙孔雀尾上
稠疊花又將金解絡我愛看不已君煩睡先著

我作繡桐詩繫君裙帶着別來苦修道此意都
蕭索今日竟相牽思量偶然錯

夢昔時

閑窻結幽夢此夢誰人知夜半初得處天明臨
去時山川已久隔雲雨兩無期何事來相感又
成新別離

恨粧成

曉日穿隙明開帷理粧點傅粉貴重重施朱憐
冉冉柔鬟背額垂叢鬢隨釵斂凝翠暈蛾眉輕
紅拂花臉滿頭行小梳當面施圓靨最恨落花

時粧成獨披掩

古決絕詞三首

乍可爲天上牽牛織女星不願爲庭前紅槿枝
七月七日一相見相見故心終不移那能朝開
暮飛去一任東西南北吹分不兩相守恨不兩
相思對面且如此背面當可知春風撩亂伯勞
語況是此時拋去時握手苦相問竟不言後期
君情旣決絕妾意已參差借如死生別安得長
苦悲

噫春冰之將泮何余懷之獨結有美一人於焉

曠絕一日不見比一日於三年況三年之曠別
水得風芳小而已波筍在苞芳高不見節矧桃
李之當春競衆人而攀折我自顧悠悠而若雲
又安能保君蹟蹟之如雪感破鏡之分明覩淚
痕之餘血幸他人之既不我先又安能後他人
之終不我奪已焉哉織女別黃姑一年一度暫
相見彼此隔河何事無

夜夜相抱眠幽懷尚沉結那堪一年事長遣一
宵說但感久相思何暇暫相悅虹橋薄夜成龍
駕侵晨列生憎野鵲性遲迴死恨天雞識時節

曙色漸曠曠華星次明滅一去又一年一年何
可徹有此迢遞期不如死生別天公隔是妬相
憐何不便教相決絕

櫻桃花

櫻桃花一枝兩枝千萬朵花墀曾立摘花人窈
破羅裙紅似火

曹十九舞綠鈿

急管清弄頻舞衣纔攬結含情獨搖手雙袖參
差列騾褭柳牽絲炫轉風迴雪凝眄嬌不移往
住度繁節

閨晚

紅裙委塼堦玉瓜斲朱橘素臆光如研明瞳艷
凝溢調絃不成曲學書徒弄筆夜色侵洞房香
煙透簾出

曉將別

風露曉淒淒月下西墻西行人帳中起思婦枕
前啼屑屑命僮御晨裝儼已齊將去復攜手日
高方解攜

薔薇架

清水驛

五色堦前架一張籠上被殷紅稠疊花半綠鮮

明地風蔓羅裙帶露英蓮臉淚多逢走馬郎可
惜簾邊思

月暗

月暗燈殘面墻泣羅纓斗重知啼濕真珠簾斷
蝙蝠飛燕子巢空螢火入深殿門重夜漏嚴柔
年急君王掌上容一人更有輕身何
處立

新秋

旦暮已淒涼離人遠思忙夏衣臨曉薄秋影入
簷長前事風隨扇歸心燕在梁殷勤寄牛女河

漢正相望

贈雙文

艷極翻含怨，憐多轉自嬌。有時還暫笑，閑坐愛無繆。曉月行看墮，春蘇見欲消。何因肯垂手，不敢望迴腰。

舞曲二名

春別

幽芳本未闌，君去蕙花殘。河漢秋期遠，關山世路難。雲屏留粉絮，風幌引香蘭。腸斷迴文錦，春深獨自看。

和樂天示楊瓊

我在江陵少年日，知有楊瓊初喚出。腰身瘦小歌圓緊，依約年應十六七。去年十月過蘇州，瓊來拜問郎不識。青衫玉兒何處去，安得紅旗遮頭白。我語楊瓊瓊莫語，汝雖笑我我笑汝。汝今無復小腰身，不似江陵時好女。楊瓊為我歌送酒，爾憶江陵縣中否。江陵王令骨為灰，車來嫁作尚書婦。盧戡及第嚴澗在，其餘死者十八九。我今賀爾亦自多，爾得老成余白首。

楊瓊本名播少為江

陵酒妓去年姑蘇過瓊敘舊及今見樂天此篇因走筆追書此曲

魚中素

重疊魚中素幽絨手自開斜紅餘淚跡知着臉
邊來

代九九

昔年桃李月顏色共花亘迴臉蓮初破低蛾柳
並垂望山多倚樹弄水愛臨池遠被登樓識潛
因倒影窺隔林徒想像止砌轉逶迤謾擲庭中
果虛攀墻外枝強持文玉佩求結麝香縞阿母
憐金重親兄要馬騎把將嬌小女嫁與冶遊兒
自隱勤勤索相要事事隨每常同坐卧不省暫
參差纔學羞兼如何言寵便移青春來易皎白

日誓先虧僻性嗔來見邪行醉後知別床鋪枕
席當面指瑕疵妾兒應猶在君情遠若斯的成
終世恨焉用此宵爲鸞鏡燈前撲鴛衾手下墮
參商半夜起琴瑟一聲離努力新叢艷狂風次
第吹

盧十九子蒙吟盧七負外洛川懷古六
韻命余和

聞道盧明府閑行詠洛神浪圓疑靨笑波闢憶
眉頰蹠躑橋頭馬空濛水上塵草芽猶犯雪冰
岸欲消春寓目終無限通辭未有因子蒙將此

曲吟似獨眠人

劉阮妻二首

仙洞千年一度開
等閑偷入又偷迴
桃花飛盡秋風起
何處消沉去不來

芙蓉脂肉綠雲鬢
罨畫樓臺青黛山
千樹桃花萬年藥
不知何事憶人間

桃花

桃花淺深處似勻
深淺粧春風助腸斷
吹落白衣裳

暮秋

看着牆西日又沉
步廊迴合戟門深
棲鳥滿樹聲聲絕
小玉上床鋪夜衾

壓牆花

野性大都迷里巷
愛將高樹記人家
春來偏認平陽宅
爲見牆頭拂面花

舞腰

裙裾旋旋手迢迢
不趁音聲自趁嬌
未必諸郎知曲誤
一時偷眼爲迴腰

白衣裳二首

雨濕輕塵隔院香
玉人初著白衣裳
半含惆悵

閑看繡一朶梨花壓象床
藕絲衫子柳花裙空著沉香慢火熏閑倚幌風
笑周昉枉拋心力畫朝雲

憶事

夜深閑到戟門邊柳遶行廊又獨眠明月滿庭
池水淥桐花垂在翠簾前

寄舊詩與薛濤因成長句

序在別卷

詩篇調態人皆有細膩風光我獨知月夜詠花
憐暗澹雨朝題柳爲歌垂長教碧玉藏深處總
向紅牋寫自隨老大不能收拾得與君閑似好

男兒

友封體

雨送浮涼夏簟清小樓腰褥怕單輕微風暗度
香囊轉隴月斜穿隔子明樺燭焰高黃耳吠柳
堤風靜紫騮聲頻頻聞動中門鎖桃葉知嗔未
敢迎

看花

努力少年求好官好花須是少年看君看老大
逢花樹未折一枝心已闌

斑竹

得之湘流

一枝斑竹渡湘沅萬里行人感別魂
知是娥皇廟前物遠隨風雨送啼痕

箏

莫愁私地愛王昌夜夜箏聲怨
隔牆火鳳有皇求不得春鶯無伴轉
空長急揮舞破催飛燕慢逐歌詞
弄小娘死恨相如新索婦枉將心
力爲他狂

春曉

半欲天明半未明醉聞花氣睡聞鶯
娃兒撼起鐘聲動二十年前曉寺情

春詞

深院無人草樹光嬌鶯不語趁陰藏
等閑弄水浮花片流出門前賺阮郎

所思二首

庾亮樓中初見時武昌春柳似腰肢
相逢相失還如夢爲雨爲雲今不知
鄂渚濛濛煙雨微女郎魂逐暮雲歸
只應長在漢陽渡化作鴛鴦一隻飛

離思六首

殷紅淺碧舊衣裳取次梳頭暗澹粧
夜合帶煙

籠曉月牡丹經雨泣殘陽低迷隱笑元無笑散
漫清香不似香頻動橫波嗔阿母等閑教見小
兒郎

自愛殘粧曉鏡中
鏤釵慢篸綠絲叢
須臾日射燕脂頰
一朵紅蘇旋欲融

山泉散漫澆堦流
萬樹桃花映小樓
閑讀道書慵未起
水精簾下看梳頭

紅羅着壓逐時新
吉了花紗嫩麴塵
第一莫嫌材地弱
些些紕慢最宜人

曾經滄海難爲水
除却巫山不是雲
取次花叢

懶迴顧半緣修道半緣君

尋常百種花齊發
偏摘梨花與白人
今日江頭兩三樹
可憐和葉度殘春

雜憶五首

今年寒食月無光
夜色纔侵已上床
憶得雙文通內裏
玉櫳深處暗聞香
花籠微月竹籠煙
百尺絲繩拂地懸
憶得雙文人靜後
潛教桃葉送鞦韆

寒輕夜淺遶迴廊
不辨花叢暗辨香
憶得雙文隴月下
小樓前後捉迷藏

山榴似火葉相兼亞拂墻堦半拂簷憶得雙文
獨披掩滿頭花草倚新簾

春冰消盡碧波湖漾影殘霞似有無憶得雙文
衫子薄鈿頭雲映退紅蘇

有所教

莫畫長眉畫短眉斜紅傷豎莫傷垂人人揔解
爭時勢都大須看各自宜

襄陽爲盧實紀事五首

帝下真符召玉真偶逢遊女暫相親素書三卷
留爲贈從向人間說向人

風弄花枝月照堦醉和春睡倚香懷依稀似覺
雙鬢動潛被蕭郎卸玉釵

鶯聲撩亂曙燈殘暗覓金釵動曉寒猶帶春醒
懶相送櫻桃花下隔簾看

瑠璃波面月籠煙暫逐蕭郎走上天今日歸時
最腸斷迴江還是夜來船

花枝臨水復臨堤閑照江流亦照泥千萬春風
好擡舉夜來曾有鳳皇棲

初除浙東妻有沮色因以四韻曉之

嫁時五月歸巴地今日雙旌上越州興慶首行

遷命婦

余在中書日妻以郡君朝會稽旁帶六太后於興慶官猥為班首

諸侯海樓翡翠閑相逐鏡水鴛鴦暖共遊我有主恩羞未報君於此外更何求

會真詩三十韻

微月透簾攏螢光度碧空遙天初縹緲低樹漸
葱龍龍吹過庭竹鸞歌拂井桐羅綃垂薄霧環
珮響輕風絳節隨金母雲心捧玉童更深人悄
悄晨會雨濛濛珠瑩光文履花明隱繡籠寶釵
行彩鳳羅帔掩丹虹言自瑤華浦將朝碧帝宮
因遊李城北偶向宋家東戲調初微拒柔情已

暗通低鬢蟬影動回步玉塵蒙轉面流花雪登
床抱綺叢鴛鴦交頸舞翡翠合歡籠眉黛羞偏
聚朱唇暖更融氣清蘭藥馥膚潤玉肌豐無力
慵移腕多嬌愛斂躬汗光珠點點髮亂綠葱蔥
方喜千年會俄聞五夜窮留連時有限繾綣意
難終慢臉含愁態芳詞誓素衷贈環明運合留
結表心同啼粉留清鏡殘燈透暗蟲華光猶冉
冉旭日漸瞳瞳警乘還歸洛吹簫亦止嵩衣香
猶染麝枕膩尚殘紅幕幕臨塘草飄飄思緒蓬
素琴鳴怨鶴清漢望歸鴻海闊誠難渡天高不

易沖行雲無處所蕭史在樓中

鄭谷十一首

登杭州城

故國江天外登臨返照間潮來無別浦木落見
他山沙鳥晴飛遠漁人夜唱閑歲窮歸未得心
逐片帆還

曲江春草

花落江堤簇暖煙雨餘草色遠相連香輪莫碾
青青破留與愁人一醉眠

十日菊

節去蜂愁蝶不知曉庭還繞折殘枝自緣今日
人心別未必秋香一夜衰

淮上漁者

白頭波上白頭翁家逐船移浦浦風一尺鱸魚
新釣得兒孫吹火荻花中

弔故禮部韋貞外序

臘雪初晴共舉盃便期攜手上春臺高情唯怕
酒不滿長慟可悲花正開曉奠鶯啼殘漏在風
幃燕覓舊巢來杜陵芳草年年綠醉魄吟魂無
復迴

席上貽歌者

花月樓臺近九衢清歌一曲倒金壺座中亦有
江南客莫向春風唱鷓鴣

淮上與友人別

楊子江頭楊柳春揚花愁殺渡江人數聲風笛
離亭晚君向瀟湘我向秦

雪中偶題

亂飄僧舍茶煙濕密灑歌樓酒力微江上晚來
堪盡處漁人披得一蓑歸

鷓鴣

暖戲平蕪錦翼齊品流應得入山雞雨昏青草
湖邊過花落黃陵廟裏啼遊子乍聞征袖濕歌
人纔唱翠眉低相呼相喚湘江浦苦竹叢深春
日西

京師冬暮詠懷

覓句干名祗自勞苦吟殊未補風騷煙開水國
花期近雪滿長安酒價高舊業已荒青鵠逕寒
江空憶白雲濤不知春到情何恨唯恐流年損
鬢毛

趙璘郎中席上賦得胡蝶

尋艷復尋香似閑還似忙暖煙沉蕙逕微雨宿
花房書幌輕隨夢歌樓誤採粧王孫深屬意繡
入舞衣裳

秦韜玉八首

長安書懷

涼風吹雨滴寒更鄉思欺人撥不平長有歸心
懸馬首可堪無寐枕蛩聲嵐收楚岫和空碧秋
染湘江到底清早晚身閑著蓑去橘香深處釣
船橫

春雪

雲重寒空思寂寥玉塵如糝滿春朝片才着地
輕輕陷力不禁風旋旋銷惹砌任他胡蝶妬縈
叢自學小梅嬌誰家醉卷珠簾看絃管堂深暖
易調

對花

長共韶光暗有期可憐蜂蝶却先知誰家促席
臨低樹何處橫釵戴小枝麗日多情疑曲照和
風得路合偏吹向人雖道渾無語幾勸王孫到
醉時

貧女

蓬門未識綺羅香擬託良媒益自傷誰愛風流
高格調共憐時世儉梳粧敢將十指誇偏巧不
把雙眉鬪畫長最恨年年壓金線爲他人作嫁
衣裳

鸚鵡

每聞別鴈競悲鳴却向金籠寄此生早是翠衿
爭愛惜可堪紅紫強分明雲漫隴樹鬼應斷歌
按秦樓夢不成幸自禰衡人未識賺他爲賦被
時輕

織錦婦

桃花日日覓新奇有鏡何曾及畫眉祇恐輕梭
難作正豈辭纖手遍生胝合蟬巧間雙盤帶聯
鴈斜銜小折枝豪貴大堆酬曲徹豈知辛苦一
絲絲

獨坐吟

客愁不盡本如水草色含情更無已又覺春愁
似草生何人種在情田裏

詠手

一雙十指玉纖纖不是風流物不拈鸞鏡巧梳
勻翠黛畫樓閑望擘珠簾金盃有喜輕輕點銀

鴨無香旋旋添因把剪刀嫌道冷泥人呵了弄
人驕

紀唐夫一首

贈溫廷筠

何事明時泣玉頻長安不見杏垣春鳳皇詔下
雖露命鸚鵡才高却累身且盡綠醺銷積恨莫
辭黃綬拂行塵方城若比長沙路猶隔千山與
萬津

雍陶一首

鷺鷥

雙鷺應憐水滿池風飄不動頂絲垂立當青草
人先見行傍白蓮魚未知一足獨拳寒雨裏數
聲相叫早秋時林塘得汝須增價況與詩人物
色宜

劉禹錫十二首

自朗州至京戲贈看花諸君子

紫陌紅塵拂面來無人不道看花回玄都觀裏
桃千樹盡是劉郎去後栽

再遊玄都觀

百畝中庭半是苔桃花淨盡菜花開種桃道士

歸何處前度劉郎今復來

聽舊宮人穆氏唱歌

曾隨織女渡天河記得雲間第一歌
休唱正元供奉曲當時朝士已無多

楊柳枝詞三首

花萼樓前初種時美人樓上鬪腰支
如今拋擲長街裏露葉如啼欲向誰
煬帝行宮汴水濱數株殘柳不勝春
晚來風起花如雪飛入宮牆不見人
城外春風吹酒旗行人揮袂日西時
長安陌上

無窮樹唯有垂楊管別離

竹枝詞三首

城西門前灩澦堆年年波浪不曾摧
懊惱人心不如石少時東去復西來
瞿唐嘈嘈十二灘此中道路古來難
長恨人心不如水等閑平地起波瀾
楊柳青青江水平聞郎江上唱歌聲
東邊日出西邊雨道是無晴還有晴

寄樂天

莫嗟華髮與無兒却是人生久遠期
雪裏高山

頭白早海中仙果子生遲于公必有高門慶謝
守何煩曉鏡悲幸免如斯分非淺祝君長詠夢
熊詩

鸚鵡

隴西鸚鵡到江東養得經年漸紅常恐思歸
先剪翅每因餒食暫開籠人憐巧語情雖重鳥
憶高飛意不同全似貴門歌舞妓深藏牢閉在
房中

和樂天送鶴

昨日看成送鶴詩高籠提出白雲司朱門乍入

應迷路玉樹容棲莫棟枝雙舞庭中花落處數
聲池上月明時三山碧海未歸去且向人間呈
羽儀

白居易八首

送鶴上裴相公

司空憐爾爾須知不信聽吟乞鶴詩羽翼勢高
寧惜別稻梁恩厚莫愁飢夜棲少共雞爭樹曉
浴先饒鳳占池穩上青雲莫迴顧的應勝在白
家時

王昭君

漢使却回憑寄語黃金何日贖蛾眉君王若問
妾顏色莫道不如宮裏時

邯鄲至除夜思家

邯鄲驛裏逢冬至抱膝燈前影伴身想得家中
深夜坐還應說著遠行人

題王侍御池亭

朱門深鎖春池滿岸落薔薇水浸莎畢竟林塘
誰是主人翁來少客來多

藍橋驛見元九詩

藍橋春雪君歸日秦嶺秋風我去時每去驛亭

先下馬循牆繞柱覓君詩

聞龜兒詠詩

憐渠已解詠詩章搖膝支頤學二郎莫學二郎
吟太苦纔年四十鬢如霜

同李十一解元憶九

花時同醉破春愁醉折花枝當酒籌忽憶故人
天際去計程今日到梁州

憶晦叔

游山弄水攜詩卷看月尋花把酒盃六事盡思
君作伴幾時歸到洛陽來

武元衡二首

荆帥

金貂再入三公府
玉帳連封萬戶侯
簾卷青山巫峽曉
雲凝碧岫渚宮秋
劉琨坐嘯風生浦
謝眺裁詩月滿樓
白雪調高歌不得
美人南國翠蛾愁

送張諫議赴闕

詔書前日下丹霄
頭帶儒冠脫皂貂
笛怨柳營煙漠漠
雲愁江館雨蕭蕭
鷓鴣得路爭先翥
松桂凌霜貴後凋
歸去朝端如有問
玉關門外老

班超

才調集卷第五




才調集卷第六


古律雜歌詩一百首

李白二十八首

長干行二首



妾髮初覆額折花門前劇郎騎竹馬來遶牀弄
 青梅同居長千里兩小無嫌猜十四為君婦羞
 顏未嘗開低頭向暗壁千喚不一迴十五始展
 眉願同塵與灰常存抱柱信豈上望夫臺十六
 君遠行瞿塘滙堆五月不可觸猿聲天上哀
 門前遲一作舊行跡一一生綠苔苔深一作淚不能



掃落葉秋風早八月胡蝶來雙飛西園草感此
傷妾心坐見一作愁紅顏老早晚下三巴預將書
報家相迎不道遠直至長風沙

憶妾

一作昔

深閨裏煙塵不曾識嫁與長干人沙

頭候風色五月南風興思君下巴陵八月西風

起想君發揚子去來悲如何見少別離多湘潭

幾日到妾夢越風波昨夜狂風度吹折江皋一作

頭樹森森暗無邊行人在何處好乘浮雲驄佳

期蘭渚東鴛鴦綠蒲上翡翠錦屏中自憐十五

餘顏色桃李紅那作商人婦愁水復愁風

古風三首

泣與親友別欲語再三咽勗君青松心努力保
霜雪世路多險艱白日欺紅顏分手一作首各千
里去去何時還

秋露如白玉團圓下庭綠我行忽見之寒草悲
歲促人生鳥過目胡乃自結束景公一何愚牛
山淚相續物苦不知足登隴又望蜀人心若波
瀾世路有屈曲三萬六千日夜夜當秉燭

燕趙有秀色綺樓

一作樹

青雲端眉目艷皎月一

笑傾城歡常恐碧草晚坐泣秋風寒纖手怨玉

琴清晨起長歎焉得偶君子共乘雙飛鸞

長相思

日色已盡花含煙月明欲愁不眠趙瑟初停
鳳凰柱蜀琴欲奏鴛鴦絃此曲有意無人傳願
隨春風寄燕然憶君迢迢隔青天昔日橫波目
今爲流淚泉不信妾腸斷歸來看取明鏡前

烏夜啼

黃雲城邊烏欲棲歸飛啞啞枝上啼機中織錦
秦川女碧紗如煙隔窻語停梭悵然憶遠人獨
宿孤房淚如雨

一作停投向人問故
夫知在流沙淚如雨

白頭吟

錦水東流碧波蕩雙鴛鴦雄飛漢宮樹雌弄秦
草芳相如去蜀謁武皇赤車駟馬生輝光一朝
再覽大人作萬壽忽欲凌雲翔聞道阿嬌失恩
寵千金買賦要君王相如不憶貧賤日官高金
多娉私室茂陵姝子皆見求文君歡愛從此畢
淚如雙泉永行墮紫羅襟五起雞三唱清晨白
頭吟長吁不整綠雲鬢仰訴青天哀怨深城崩
杞梁妻誰道土無心東流不作西歸水落花辭
枝羞故林頭上玉燕釵是妾嫁時物贈君表相

思羅袖幸時拂莫卷龍鬚席從他生網絲且留
琥珀枕還有夢來時鷓鴣裘在錦屏上自君一
挂無由披妾有秦樓鏡照心勝照井願持照新
人雙對可憐影覆水却收不滿杯相如還謝文
君迴古來得意不相負祇今唯有青陵臺

贈漢陽輔錄事

鸚鵡洲橫漢陽渡水引寒煙沒江樹南浦登樓
不見君君今罷官在何處漢口雙魚白錦鱗今
傳尺素報情人其中字數無多少只是相思秋
復春

擣衣篇

閨裏佳人年十餘嘔蛾對影恨離居忽逢江上
春歸燕銜得雲中尺素書玉手開絨長歎息狂
夫猶戍交河北萬里交河水北流願為雙鳥泛
中洲君邊雲擁青絲騎妾處苔生紅粉樓樓上
春風日將歇誰能攬鏡看秋髮曉吹負管隨落
花夜擣戎衣向明月明月高高刻漏長真珠簾
箔掩蘭堂橫垂寶幄同心結半拂瓊筵蘇合香
瓊筵寶幄連枝錦燈燭熒熒照孤寢有使憑將
金剪刀為君留下相思枕摘盡庭蘭不見君紅

巾拭淚生氳氳明年更若征邊塞願作陽臺一段雲

大堤曲

漢水橫襄陽花開大堤暖佳期大堤下淚向南雲滿春風復無情吹我魂夢亂不見眼中人天長音信斷

青山獨酌

蒲萄酒金叵一作破羅吳姬十五細馬馱青黛畫眉紅錦靴道字不正嬌唱歌玳瑁筵中懷裏醉芙蓉帳底奈君何

未央父別離

別來幾春未還家玉窻五見櫻桃花況有錦字書開緘使人嗟此腸斷彼心絕雲鬢綠鬢罷梳一作攬結愁如迴颺亂白雪去年寄書報陽臺今年寄書重相催東風一本云胡為乎東風為我吹行雲使西來待來竟不來落花寂寂委青苔

紫驢馬

紫驢行且嘶雙翻碧玉啼臨流不肯渡似惜錦障泥白雪關山遠黃雲海樹迷揮鞭萬里去安得念春閨

宮中行樂三首

盧橘爲秦樹蒲桃出漢宮
煙花宜落日絲管醉
春風笛奏龍鳴水簫吟
鳳下空君王多樂事何
必向回中

寒雪梅中盡春風柳上歸
宮鶯嬌欲醉簷燕語
還飛遲日明歌席新花
艷舞衣晚來移綵仗行
樂好一作泥光輝

水滌南薰殿花紅北闕樓
鶯歌聞太液鳳吹遶
瀛洲素女鳴珠珮天人
弄綵毬今朝風日好宜
入未央遊

愁陽春賦

東風歸來見碧草而知春
蕩漾惚恍何垂楊旖
旎之愁人天光清而妍
和海氣綠而芳新野綵
翠而芊絲雲飄颻而相
鮮演漾兮寅緣窺青苔
之生泉縹緲兮翩緜見
遊絲之縈煙魂與此兮
俱斷醉風光兮悽然若
乃隴水秦聲江猿巴吟
明妃玉塞楚客楓林試
登高而望遠痛切骨而
傷心春心蕩兮如波春
愁亂兮如雪兼萬情之
悲歡茲一作紛一感於
芳節我所思兮湘水濱
隔雲霓而見無因灑別
淚於尺波寄東流於情
親

若使春光可攬而不減兮吾欲贈天涯之佳人

寒女吟

昔君布衣時與妾同辛苦一拜五官郎便索邯鄲女妾欲辭君去君心便相許妾讀靡蕪書悲歌淚如雨憶昔嫁君時曾無一夜樂不是妾無堪君家婦難作起來強歌舞縱好君嫌惡下堂辭君去去後悔遮莫

相逢行

相逢紅塵內高揖黃金鞭萬戶垂揚裏君家阿那邊

紫宮樂五首

小小生金屋盈盈在紫微山花插寶髻石竹繡羅衣每出深宮裏常隨步輦歸只愁歌舞散化作絲雲飛

玉樹春歸日金宮樂事多後庭朝未入輕輦夜相過笑出花間語嬌來燭下歌莫教明月去留著醉姮娥

柳色黃金嫩梨花白雪香玉樓巢一作關翡翠珠

殿鎖鴛鴦選妓隨雕輦徵歌出洞房宮中誰第一飛燕在昭陽

繡戶香風暖紗窗曙色新宮花爭笑日池草暗
生春綠樹聞歌鳥青樓見舞人昭陽桃李月羅
綺自相親

今日明光裏還須結伴遊春風開紫殿天樂下
珠樓艷舞全知巧嬌歌半欲羞更憐花月夜宮
女笑藏鉤

會別離

結髮生別離相思復相保如何日已遠五變庭
中草渺渺天海途悠悠漢江島但恐不出門出
門無遠道道遠行寄難家貧衣復單嚴風吹雨

雪晨起臯何酸人生各有志豈不懷所安分明
天上日生死誓同歡

江夏行

憶昔嬌小姿春心亦自持為言嫁夫壻得免長
相思誰知嫁商賈令人却愁苦自從為夫妻何
曾在鄉土去年下揚州相送黃鶴樓眼看帆去
遠心逐江水流只言期一載誰謂歷三秋使妾
腸欲斷恨君情悠悠東家西舍同時發北去南
來不逾月未知行李遊何方作箇音書能斷絕
適來往南浦欲問西江船正見當爐女紅粧二

八年一種為人妻，獨自多悲恸。對鏡便垂淚，逢人只欲啼。不如輕薄兒，旦暮長追隨。悔作商人婦，青春長別離。如今正好同歡樂，君去容華誰得知。

相逢行

朝騎五花馬，謁帝出銀臺。秀色誰家子，雲車珠箔開。金鞭遙指點，玉勒近遲迴。夾轂相借問，知一作疑從天上來。邀入青綺門，當歌共銜杯。銜杯映歌扇，似月雲中見。相見不得親，不如不相見。相見情已深，未語可知心。胡為返一作守空閨，孤

眠愁錦衾錦衾語

與一作

羅帷纏綿會有時。春風

正澹蕩，暮雨來何遲。願

後一作

因三春

一作青

鳥更

報長相思，光景不待人。須臾駿成絲，當年失行

樂老去，徒傷悲。持此道密意，無令曠佳期。

無一本

六句

李商隱四十首

錦檻

錦檻芙蓉入，香臺翡翠過。撥弦驚火鳳，交扇拂天鵝。隱忍陽城笑，喧傳郢市歌。仙眉瓊作葉，佛髻鈿爲螺。五里無因霧，三秋只見河。月中供藥

荆海上得綃多玉集胡沙割犀留聖水磨斜門
穿戲蝶小閣鎖飛蛾騎檐侵鞦韆卷車帷約憶鈿
傳書兩行鴈取酒一封駝橋迥涼風壓溝橫夕
照和待烏燕太子駐馬魏東阿想像鋪芳縵依
侑解醉羅散時簾隔露卧後幕生波梯穩從攀
桂弓調任射莎豈能拋斷夢聽鼓事朝珂

曉坐

一云後閣

後閣能朝眠前墀思黯然梅應未假雪柳自不
勝煙淚續淺深綆腸危高下絃紅顏無定所得
失在當年

天無夢碧城三首

碧城十二曲闌干犀辟塵埃玉辟寒闥苑有書
多附鶴女墻無樹不棲鸞星沉海底當窻見雨
過河源隔座看若是曉珠明又定一生長對水
精盤

對影聞聲已可憐玉池荷葉正田田不逢蕭史
休迴首莫見洪崖又拍肩紫鳳放嬌銜楚珮赤
鱗狂舞撥湘絃鄂君悵望舟中夜繡被焚香獨
自眠

七夕來時先有期洞房簾箔至今垂玉輪頽鬼

初生魄鐵網珊瑚未有枝檢與神方教駐景收
將鳳紙寫相思武皇內傳分明在莫道人間揔
不知

飲席代官妓贈兩從事

新人橋上著春衫舊生江邊側帽簷隋獨孤信舉止風流

曾風吹帽簷側觀者塞路願得化為紅綬帶許教雙鳳一時

街下

代元城吳令暗為荅

背闕歸藩路欲分水邊風物半西曛荆王枕上
元無夢莫枉陽臺一片雲

杏花

上國昔相值亭亭如欲言異鄉今暫賞脉脉豈
無恩暖少風多力墻高月有痕為含無限思遂
對不勝繁仙子玉京路主人金谷園幾時辭碧
落誰伴過黃昏鏡拂鉛華膩鑪藏桂燼温終應
催竹葉先擬詠桃根莫學啼成血從教夢寄魂
具王採香逕失路入煙村

燈

皎潔終無倦煎熬亦自求花時隨酒遠雨夜背
窻休冷暗黃茅驛暄明紫桂樓錦囊名畫掩玉

局敗碁收何處無佳夢誰人不隱憂影隨簾押
轉光信篔簹文流客自勝潘岳儂今定莫愁固應
留半焰迴照下幃羞

代魏宮私贈

黃初三年已隔存沒追代其意何必同時亦廣子夜

魏歌之流

來時西館阻佳期去後漳河隔夢思知有宓妃
無限意春松秋菊可同時

松一作蘭

齊宮詞

永壽兵來夜不扃金蓮無復印中庭梁臺歌管
三更罷猶自風搖九子鈴

銀河吹笙

悵望銀河吹玉笙樓寒院冷接平明重衾幽夢
他年斷別樹羈雌昨夜驚月榭故香因雨發風
簾殘燭隔霜清不須浪作緜山意湘瑟秦簫自
有情

題後重有戲贈任秀才

一丈紅葦擁翠筠羅窓不識繞街塵峽中尋覓
長逢雨月裏依稀更有人虛爲錯刀留遠客枉
綠書札損文鱗遙知小閣還斜照羨殺烏龍卧
錦茵

春雨

帳卧新春白袷衣
白門寥落意多違
紅樓隔雨相望冷
珠箔飄燈獨自歸
遠路應悲春晚殘
宵猶得夢依稀
玉璫緘札何由達
萬里雲羅一鴈飛

富平侯

七國三邊未到憂
廿三身襲富平侯
不收金彈拋林外
却借銀床在井頭
綵樹轉燈珠錯落
繡襪迴枕玉雕鏤
當關不報侵晨客
新得佳人字莫愁

促漏

促漏遙鐘動靜聞
報章重疊香難分
舞鸞鏡匣收殘黛
睡鴨香爐換夕薰
歸去定知還向月
夢來何處更爲雲
南塘漸暖蒲堪結
兩兩鴛鴦護水紋

江東

驚魚撥刺燕翩翩
獨自江東上釣船
今日春光大漂蕩
謝家輕絮沈郎錢

七夕

鸞扇斜分鳳幄開
星橋橫過鵲飛迴
爭將世上

無期別換得年年一度來

可歎

幸會東城宴未迴年華憂共水相催梁家宅裏
秦宮入趙氏樓中赤鳳來冰簟且眠金鏤枕瓊
筵不醉玉交盃宓妃愁坐芝田館用盡陳王八
斗才

曉起

擬盃當曉氣呵鏡有微寒隔箔山櫻發褰幃桂
燭殘晝長為報曉夢好更尋難影響輸雙蝶偏
過舊畹蘭

腸

有懷非惜恨不奈寸腸何即夕迴弥久前時斷
固多熱應翻急燒冷欲徹空波隔樹淅淅雨通
池點點荷倦程山向背望國闕差我故念飛書
及新懽借夢過漆筠休伴淚繞雪莫追歌擬問
陽臺事年深楚語訛

獨居有懷

麝重愁風逼羅疎畏月侵怨魂迷恐斷嬌喘細
疑沉數急芙蓉帶頻抽翡翠簪柔情終未達遙
妬已先深浦冷鴛鴦去園空蛺蝶尋蠟花長遞

淚箏柱鎮移心覓使嵩雲暮回頭灞岸陰只聞
涼葉院露井近寒砧

代贈二首

樓上黃昏望欲休玉梯橫絕月中鈎芭蕉不展
丁香結同向春風各自愁
東南日出照高樓樓上離人唱石州揔把春山
掃眉黛不知供得幾多愁

宮辭

君恩如水向東流得寵憂移失寵愁莫向樽前
奏花落涼風只在殿西頭

追代盧家人嘲堂內
道却橫波字人前莫謾羞只應同楚水長短入
淮流

訪人不遇留題別館

卿卿不惜瑣窻春去作長楸走馬身閑倚繡簾
吹柳絮日高深院斷無人

代應

本來銀漢是紅牆隔得盧家白玉堂誰與王昌
報消息盡知三十六鴛鴦

楚吟

山上離宮宮上樓樓前宮畔暮江流楚天長短
黃昏雨宋玉無愁亦自愁

龍池

龍池賜酒敞雲屏羯鼓聲高衆樂停夜半宴歸
宮漏永薛王沉醉壽王醒

淚

永巷長年怨綺羅離情終日思風波湘江竹上
痕無限峴首碑前灑幾多人去紫臺秋入塞兵
殘楚帳夜聞歌朝來灞水橋邊問未抵青袍送
玉珂

即目

地寬樓已迥人更迥於樓細意經春物傷醒屬
暮愁望賒殊易斷恨久欲難收大執真無利多
情豈自由空垣兼樹廢敗港擁花流書去青楓
驛鴻歸杜若洲單樓應分定辭疾索誰憂更替
林鴉恨驚頻去不休

水天閑話舊事

月姊曾逢下彩蟾傾城消息隔重簾已聞珮響
知腰細更辨絃聲覺指纖暮雨自歸山峭峭秋
河不動夜耿耿王昌且在墻東住未必金堂得

免嫌

漢宮詞

青雀西飛竟未迴君王長在集靈臺侍臣最有
相如渴不賜金莖露一盃

席上作

一云予為桂州從事故鄭公出家妓令賦高唐詩

澹雲輕雨拂高唐王殿秋來夜正長料得也應
憐宋玉一生唯事楚襄王

留贈畏之

時將赴職梓潼過韓朝迴三首

待得郎來月已低寒暄不道醉如泥五更又欲
向何處騎馬出門烏夜啼

馬嵬

海外徒聞更九州他生未卜此生休空聞虎旅
鳴宵柝無復雞人報曉籌此日六軍同駐馬當
時七夕笑牽牛如何四紀為天子不及盧家有
莫愁

離亭賦得折楊柳二首

暫憑樽酒送無憀莫損愁眉與細腰人世死前
唯有別春風爭擬惜長條

含煙惹露悔依依萬緒千條拂落暉為報行人
休盡折半留相送半迎歸

深宮

金殿銷香閉綺攏，玉壺傳點咽銅龍。
狂飈不惜蘿陰薄，清露偏知桂葉濃。
斑竹嶺邊無限淚，夕陽宮裏及時鐘。
豈知爲雨爲雲處，祇有高唐十二峯。

李涉十五首

寄荊娘寫真

章華臺南莎草齊，長河柳色連金堤。
青樓曠曠曙光早，梨花滿巷鶯新啼。
章臺玉顏年十六，小來能唱西梁曲。
教坊大使久知名，郢上詞人歌

不足少年才子心，相許夜夜高唐夢。
雲雨五銖香帔結同心，三寸紅牋替傳語。
緣池並戲雙鴛鴦，田田翠葉紅蓮香。
百年恩愛兩相許，一夕不見生愁腸。
上清仙女微遊伴，欲從湘靈住河漢。
只愁陵谷變人寰，空歎桑田歸海岸。
願分精魄定形影，永似銀壺挂金井。
召得丹青絕世工，寫真與身真相侔。
忽然相對兩不語，疑是粧成來鏡中。
豈期人願天不違，雲軒却駐從山歸。
畫圖封裏寄箱篋，洞房艷艷生光輝。
良人翻作東飛翼，却遣江頭問消息。
經年不得一封書，翠幕雲

屏遠空壁結客有少年名揔身姓王征帆三千
里前月發豫章知我別時言識我馬上郎恨無
羽翼飛使我徒怨滄波長開篋取畫圖寄我形
影與客將如今憔悴不相似恐君重見生悲傷
蒼梧九疑在何處斑斑竹淚連瀟湘

與李渤新羅劍歌

我有神劍異人與暗中往往精靈語識者知從
東海來來時一夜因風雨長河臨曉北斗殘秋
水露背青螭寒昨夜大梁城下宿不借蹀跖光
顏看刃邊颯颯塵沙缺癩痕半是蛟龍血雷煥

張華久已無沉寃知向何人說我有愛弟都九
江一條直氣今無雙青光好去莫惆悵必斬長
鯨須少壯

六歎只書兩首

綺羅香風翡翠車晴明獨傍芙蓉渠上有雲鬢
洞仙女垂羅掩縠煙中語風月頻驚桃李時滄
波久別鴛鴦侶欲傳一札孤飛翼山長水遠無
消息却鎖重門一院深半夜空庭明月色

深院梧桐夾金井上有轆轤青絲索美人清晝
汲寒泉寒泉欲上銀瓶落迢迢碧甃千餘尺竟

日倚欄空歎息惆悵不來照明鏡却掩洞房花
寂寂

重過文上人院

南隨越鳥北燕鴻松月三年別遠公無限心中
不平事一宵清話又成空

潤州聽角

江城吹角水茫茫曲引邊聲怨思長驚起暮天
沙上鴈海門斜去兩三行

再宿武關

遠別秦城萬里遊亂山高下出商州關門不鎖

寒溪水一夜潺潺送客愁

鷓鴣詞二首

湘江煙水深沙岸隔楓林何處鷓鴣飛日斜斑
竹陰二女虛垂淚三閭枉自沉唯有鷓鴣啼獨
傷行客心

越崗連越井越鳥更南飛何處鷓鴣啼夕煙東
嶺歸嶺外行人少天涯北客稀鷓鴣啼別處相
對淚霑衣

牧童詞

朝牧牛牧牛下江曲夜牧牛牧牛村谷荷蓑

出林春雨細蘆管卧吹莎草綠亂插蓬蒿箭滿
腰不怕猛虎欺黃犢

竹枝詞

荆門灘急水潺潺兩岸猿啼煙滿山渡頭年少
應官去月落西陵望不還
巫峽雲開神女祠綠潭紅樹影參差不勞戍口
初相問無義灘頭刺別離
石壁千重樹萬重白雲斜掩碧芙蓉昭君溪上
年年月獨自嬋娟色最濃
十二峯頭月欲低空濛灘上子規啼孤舟一夜

東歸客泣向春風憶建溪

寄贈妓人

兩行客淚愁中落萬樹山花雨後殘君到揚州
見桃葉為傳風雨過江難

唐彥謙十七首

柳

惹絆風光別有情世間誰敢鬪輕盈楚王江畔
無端種餓損宮娥學不成

牡丹

真宰多情巧思新固將能事送殘春為雲為雨

徒虛語傾國傾城不在人開日綺霞應失色落
時青帝合傷神常娥婺女曾相送留下鷓黃作
藥塵

春雨

綺陌夜來雨春樓寒望迷遠容迎燕戲亂響隔
鶯啼有恨開蘭室無言對李蹊花歌渾拂檻柳
重欲垂堤燈檠昏魚目薰爐咽麝臍別輕天北
鶴夢怯汝南鷄入戶侵羅幌梢簷潤繡題新豐
樹已失長信草初齊亂蝶寒猶舞驚鳥暝不栖
庾郎盤馬地却怕有春泥

秋晚高樓

松拂疎窻竹映欄素琴幽怨不成彈清霄霽極
雲離岫紫禁風高露滿盤晚蝶飄零經宿雨暮
鴉凌亂報秋寒高樓睜目歸鴻遠始信嵇康欲
畫難

寄難八

上已接寒食鶯花寒落展微微潑火雨草草踏
青人涼似三秋景清無九陌塵伯輿同病者對
此合傷神

長溪秋望

柳暗沙長溪水流
雨微煙暝立溪頭
寒鴉閃閃前山遠
杜曲黃昏獨自愁

一作短

離鸞

聞道離鸞思故鄉也
知情願嫁王昌塵埃一別
揚朱路風月三年宋玉墻
下疾不成雙點淚斷
多難到九迴腸
庭前佳樹名梔子
試結同心寄謝娘

曲江春望

杏艷桃嬌奪晚霞
樂遊無廟有年華
漢朝冠蓋皆陵墓
十里宜春下苑花

柳

春思
春愁一萬枝
遠村遙岸寄相思
西園有雨和苔長
南內無人拂檻垂
遊客寂寥絨遠恨
暮鶯啼叫惜芳時
晚來飛絮如霜鬢
恐為多情管別離

春陰

一寸迴腸百慮侵
旅愁危涕兩爭禁
天涯已有銷魂別
樓上寧無擁鼻吟
感事不關河裏笛
傷心應倍雍門琴
春雲更覺愁於我
閑蓋低村作暝陰

春深獨行馬上有作

日烈風高野草香
百花狼籍柳披猖
連天瑞靄千門遠
夾道新陰九陌長
衆飲不懽逃席酒
獨行無味放游韉
年來與問閑遊者
若箇傷春向路傍

寄蔣二十四

鳥嘯蜂飛日漸長
旅人情味海思量
禪門澹泊無心地
世事生疎欲面牆
二月雲煙迷柳色
九衢風土帶花香
大知高士禁愁寂
試倚欄干莫斷腸

漢代

漢代金爲屋
吳宮綺作寮
艷詞傳靜婉
新曲定嬌饒
箭響猶殘夢
籤聲報早朝
鮮明臨曉日
迴轉度春宵
半神籠清鏡
前絲壓翠翹
靜多如有待
閑極似無膠
梓澤花猶滿
靈和柳未彫
障昏巫峽雨
屏掩浙江潮
未信潘名岳
應疑史姓蕭
漏因歌暫斷
燈爲雨頻挑
飲酒闌三雅
投壺賽百嬌
鈿蟬新翅重
金鴨舊香焦
水淨疑澄練
霞孤欲建標
別隨秦柱促
愁爲蜀玄么
玄晏難瘳痺
臨卽但發瘳
聯詩徵弱絮
思友詠甘蕉
王氏

憐諸謝周郎定小喬
黼幃翹綵雉波扇畫文鯨
荇密妨垂釣荷歌欲渡橋
不因衣帶水誰覺路
迢迢

春殘

景爲春時短愁隨別夜長
暫暮寧號隱輕醉不成鄉
風雨曾通夕莓苔有衆芳
落花如便去樓上即河梁

小院

小院無人夜煙斜
月轉明清宵易惆悵
不必有離情

寄懷

有客傷春復怨離
夕陽亭畔草青時
淚隨紅蠟無由制
腸比朱絃恐更危
梅向好風唯是笑
柳因微雨不勝垂
雙溪未去饒歸夢
夜夜孤眠枕
獨歌

玫瑰

麝炷騰清燎
鮫紗覆綠蒙
宮粧臨曉日
錦段落東風
無力春煙裏
多愁暮雨中
不知何事意
深淺兩般紅

